

Den fin di siman

## Aruba a perde dos conocido comerciante



**TABATA** diasabra mainta, cu a drenta e tristo noticia cu e conocido comerciante, Roy Harms, a fayece na edad di 87 aña. E tabata un di e pioneronan den negoshi di freezone riba nos isla y a haci negoshi grandi pa nos isla. Hunto cu su rumannan, a funda Harms Brothers, pa despues a dicidi di distancia cu mes y aisna a funda Romar Trading.

Roy Harms, tabata un comerciante masha stima y aprecia pa comunidad Arubano. Roy Harms a bay laga atras su señora y su yiunan Milton, Belinda y Juliska Harms.

Tambe den fin di siman, nos a haya e triste noticia cu e conocido propietaria di Elsa's Flowershop, Cirila Elizabeth Geerman Dubero, yama pa hopi

Elsa of Mama Elsa na edad di 84 aña. Sra. Elsa a traha hopi cu hubentud di Club Estrella riba deporte y yuda den Parokia di Santa Cruz, y hasta a keda condecora den Orde di Oranje Nassau.

Na 1977 el a lanta su floresteria cu ta carga su nomber y cu te na dia di awe ta un di e floresterianan mas popular di nos isla. Tabata na 2005 cu Mama Elsa a pasa e floresteria pa su yiu homber Robert. E ta mama tambe di conocido ex presentador di noticia Glenda Arends y Marlyn Croes.

Na famianan di Roy Harms y di Elsa Geerman ta bay nos mas sincero condolencia y ta desea nan hopi forza n'e momento dificil aki.

## Recordando señor Roy Harms, kende a bay sosega

**ARUBA** a conoce un gran ser humano, yiu, tata, esposo, abuelo y negociante den señor Roy Harms. Despues cu su mayornan a muda di Brooklyn, New York, bin biba na Aruba, na 1932 Roy a nace. Esaki ta despues di e *great depression*.

Roy a completa su estudio na Juliana School y a cuminsa labora na Aruba Bank. Na 1956 el a cuminsa traha cu su ruman homber na Harms Brothers. Tres aña despues, esta na 1959 el a drenta enlace matrimonial cu Maritza y di e matrimonio a nace 4 yiu. Na 1989, el a funda Romar Freezone N.V y Romar Trading N.V, nomber cu ta un combinacion di Roy y Maritza. Awendia, e grupo di negoshi aki ta opera na Aruba, Curacao y Bonaire. Ademas di Romar N.V, Roy, cu su aficcion na negoshi, a funda un carlevarship conhuntamente cu Moravian Church Foundation.

Banda di su negoshinan, e ta un co-fundador di Aruba Nautical Club, miembro activo di comunidad Protestant y co-fundador di Stichting Edmund E. Harms. Den su tempo liber, e tabata gusta hunga domino, wak un bon wega di baseball, futbol y tennis. Como gran deportista, el a representa su pais como basebolista pa Team Aruba den Caribbean Series, cu a tuma lugar na 1953.



Como reconocimiento di tur su logronan, tanto como deportista y como comerciante atento pa contribui na su pais, el a ricibi condecoracion Orde van Oranje-Nassau na april 1975. Roy ta laga atras su legacia di su vision pa negoshi, su pasion pa deporte y ehempel di un bon Arubiano contribuido na su pais. Ademas, e ta laga atras su mas gran tesoro cu ta su famia: su señora Maritza, su yiunan Milton, Belinda y Juliska, su nueve nietonan y su dos bisanietonan, p'e bay topa cu su yiu Edmund, cu a bay prome cu ne.

Cu señor Roy sosega dushi den brasa di su Creador.